



BILTEN

OPĆINE SREBRENİK



IZDAJE: OPĆINA SREBRENİK • BROJ: 25 • MJESEC: SEPTEMBAR/RUJAN 2008. • BILTEN JE BESPLATAN • TIRAŽ 1000



KLJUČEVI STAROG GRADA SREBRENİKA
U SIGURNIM RUKAMA

ZNAČAJNO

Općini Srebrenik certifikat za završeni projekt "Ugovor"

Nakon nekoliko godina intenzivnog rada Misija OSCE-a u BiH, dana 26.06.2008.godine, u Sarajevu je organizovala svečanost dodjele priznanja-certifikata za 30 općina iz cijele BiH, povodom uspješnog završetka Programa reforme javne uprave (MAP) i projekta «Ugovor». Kako je istaknuto na ceremoniji, obzirom da je općina Srebrenik među prvima u BiH uspješno završila MAP projekat,



Sa dodjele certifikata Općini Srebrenik

te dobila navedeni certifikat prije godinu dana, ovom prilikom sekretaru OV-a Srebrenik Ibračević Sakibu i stručnom savjetniku za informacioni sistem Mujčinović Nedimu, koji su u ime općine Srebrenik prisustvovali ceremoniji, uručen je certifikat o uspješno završenih svih 5 modula projekta «Ugovor», u kojem općine imaju obavezu raditi sa građanima i za građane, kako bi postigli zajedničke ciljeve. -Završetkom ovih projekata, općine su korak bliže ispunjenju ciljeva koje su postavile lokalne vlasti i proces reforme javne uprave u BiH, čiji je krajnji cilj poboljšanje pružanja usluga građanima i preduslova za pridruživanje Evropskoj uniji, istakao je Daglas Dejvidson šef Misije OSCE-a u BiH.

Sjećanje na šehide, RVI i DB-e



Sa dodjele priznanja «Zlatnim ljiljanima»

Dana 20.06.2008.godine, u «Plavoj sali» Doma kulture, održana je svečana sjednica posvećena šehidima, ratnim vojnim invalidima i demobilisanim borbama. U okviru manifestacije Dani otpora, načelnik Općine Srebrenik Osman Suljagić i predsjedavajući Općinskog vijeća prim. dr Ibrahim Zukić, u saradnji sa boračkim organizacijama, upriličili su prijem za one koji su dali najviše u ratnom periodu, kojima su tom prilikom podijeljena priznanja i novčane nagrade, dok su ove darove za šehide, primili najbliži članovi njihovih porodica. –Ovo je prvi put da su s nama i predstavnici HVO-a, koji su također učestvovali u oslobodilačkom ratu, i koji su veoma zaslužni za odbranu naše domovine. Bilo bi najbolje kada bi se sva



Sa svečane sjednice održane u sklopu manifestacije «Dani otpora 2008»

boračka udruženja udružila na višim nivoima, čime bi se lakše izborili za svoja prava, kazao je između ostalog načelnik Općine Srebrenik, Osman Suljagić. Dodatnu «težinu» ovoj manifestaciji dala je, svojim monolozima, i naša glumica Fatima Džaferović. Nakon svečane sjednice, posljednji put je položeno cvijeće na staro spomen-obilježje šehidima i poginulim borbama ispred Doma kulture, dok će se cvijeće ubuduće polagati na novom spomen-obilježju, u ulici Alije Izetbegovića.

Sinovi Bosne dobili dostojno spomen-obilježje

Borci za odbranu Bosne i Hercegovine u Srebreniku su dobili novo spomen-obilježje, koje je izgrađeno u ulici Alije Izetbegovića. Oni koji su dali svoje živote kako bismo mi danas mogli mirno i spokojno koračati Bosnom i Hercegovinom, svakako su zaslužili jedan ovakav spomenik koji je izgrađen u budućoj pješačkoj zoni Srebrenika. Od završetka rata do danas, oni koji su dali svoje živote za odbranu BiH, imali su spomen-obilježje koje je bilo postavljeno u krugu Centra za kulturu i informisanje u Srebreniku, a koje je izgrađeno na dosta skroman način. –Upravo zbog izgradnje pješačke zone, u čiji smo projekat ubacili i izgradnju novog spomen-obilježja, do sada se nije ni



Staro spomen-obilježje ispred Centra za kulturu i informisanje

radilo na izgradnji istog na drugim predloženim lokacijama. Smatramo da su poginuli borci i šehidi zaslužili da se njihovo obilježje postavi upravo u centru budućeg monumentalnog trga, u strogom Centru grada, gdje će svima biti pred očima, kako se nikada ne bi zaboravilo šta su uradili za nas i našu djecu, kaže općinski načelnik Osman Suljagić.



Novo spomen-obilježje u Centru Srebrenika

SA SJEDNICA OPĆINSKOG VIJEĆA

Radno vrijeme ugostiteljskih objekata na "čekanju"

Na 46. sjednici OV-a Srebrenik usvojen je rebalans budžeta za 2008.godinu, jer je uređenjem pješačke zone u ulici Alije Izetbegovića, zatim sanacijom nekoliko gradskih ulica kao i završetkom radova na gradskoj deponiji u Babunovićima, došlo do povećanja cijena materijala, a ovi minusi će se namiriti viškom



Sa 46. sjednice OV-a Srebrenik

sredstava iz prošle godine koji iznosi oko 1.280.000 KM. Mnogo rasprave izazvao je Prijedlog odluke o radnom vremenu ugostiteljskih objekata, pa je na kraju donesen zaključak da se održi javna rasprava sa građanima MZ Srebrenik I kao i sa ugostiteljima, kako bi se pronašlo zajedničko rješenje, u kome građani ne bi bili pretjerano uznemireni u noćnim satima zbog glasne muzike, a s druge strane da ugostitelji ne bi bili onemogućeni da normalno rade. Bez rasprave je usvojen Urbanistički projekat «Koprića-bašča», gdje će uskoro firma «Kopex» Srebrenik započeti izgradnju modrnog stambeno-poslovnog objekta, kao i odluka o odobravanju sredstava za adaptaciju ambulante Brezik. Vijećnici su usvojili i odluku o subvencioniranju troškova boračkoj populaciji kako bi lakše pribavili građevinsku dokumentaciju u svrhu obezbjeđenja uslova za rješavanje stambenog pitanja. Usvojen je Izvještaj o radu JP «Vodovod i kanalizacija» Srebrenik za 2007.godinu, a ovom preduzeću je odobrena garancija za zaduženje od 200.000 KM, kako bi se finansirala izgradnja postrojenja za obaranje mutnoće na izvorištu «Kugičko vrelo» na vodovodu u Dubokom Potoku, gdje mještani, koji koriste vodu sa ovog izvorišta, vrlo često imaju problema sa pitkom vodom.

Usvojen Izvještaj o izvršenju budžeta za prvo polugodište 2008.g.



Sa 47. sjednice OV-a Srebrenik

Prihodi budžeta Općine Srebrenik, za prvih šest mjeseci ove godine, ostvareni su iznosu od oko 4.807.000 KM, a nešto veća njegova rashodovna strana od oko 5.355.000 KM, pokrivena je prenesenim viškom prihoda, u iznosu od 1.285.000 KM, iz prošle godine, navedeno je u Izvještaju o ostvarenju općinskog budžeta za prvo polugodište 2008. godine, koji je i usvojen na 47.sjednici sjednici Općinskog vijeća Srebrenik, koja je održana 27.08.2008.godine. Bez veće rasprave usvojena je i Odluka o subvencioniranju troškova naknada za rentu i uređenje dodijeljenog građevinskog zemljišta licima iz reda boračkih kategorija, kao i Program mjera za poticaje primarnoj poljoprivrednoj proizvodnji, za tekuću kalendarsku godinu, u iznosu od 130.000 KM. Obzirom da su radovi na uređenju prve faze Općinske deponije, u odnosu na ugovorom predviđeni rok, probijeni za više od 9 mjeseci, OV-e Srebrenik usvojilo je i Odluku o umanjenju naknade za izvršene radove preduzeću «ITK Musić» d.o.o. Srebrenik, u ukupnom

Za most na Slanjanskoj rijeci 300.000 KM

Na ovoj sjednici prihvaćena je i odluka o sufinansiranju radova rekonstrukcije mosta na Slanjanskoj rijeci, na Regionalnom putnom pravcu Srebrenik–Donja Orahovica. Riječ o iznosu od 100.000 KM, koji će se za pomenute radove planirati u budžetu Općine Srebrenik za 2009 g., kada će se i moći realizovati, dok će Vlada TK-a ovaj projekat finansirati sa 200.000 KM.

iznosu od oko 114.000 KM. Iako je prvobitno bila predviđena za usvajanje na ovoj sjednici OV-a, Odluka o radu objekata uslužnih djelatnosti na području Općine Srebrenik, vraćena je na doradu. Naime, kako se moglo čuti u samoj raspravi, nije sporna dužina radnog vremena ugostiteljskih objekata, koliko jačina buke koja se reprodukuje u njima, što remeti noćni mir stanara u užem gradskom području. Bez rasprave je usvojen Pravilnik o unutrašnjoj organizaciji i sistematizaciji Stručne službe OV-a, kao i Nacrt Odluke o usklađivanju statuta JP «Veterinarska stanica» Srebrenik sa Zakonom o privrednim društvima i Zakonom o javnim preduzećima FBiH.

PRIVREDA

"Hilana" otvorila nove proizvodne pogone

U sklopu aktivnosti obilježavanja 21. juna Dana općine Srebrenik, dana 19.06.2008.godine upriličena je svečanost na kojoj su presijecanjem vrpce, pred oko stotinjak zvanica, direktor firme «Hilana»



Sa svečanom otvorenja novog pogona «Hilane»

Almir Duranović, općinski načelnik Osman Suljagić i ministar finansija u Vladi TK-a Sead Bećirović, zvanično otvorili novoizgrađeni proizvodni pogon za proizvodnju građevinske stolarije u Špionici. Direktor Duranović je u uvodnom izlaganju podsjetio na historijat firme «Hilana» d.o.o. Srebrenik istakavši da je to privatno preduzeće, formirano 1996. godine sa ciljem obavljanja usluga vezanih za maloprodaju prehrambenih artikala, staklorezačke i frizerske usluge. Sve do kraja 1998. godine, sa ukupno 3 uposlena radnika, obavljane su navedene usluge. Početkom

KOMERCIJALNO POKRIVENO CIJELO TRŽIŠTE BiH

Bitno je napomenuti da je sada proizvodnja građevinske stolarije osnovna djelatnost firme. Firma trenutno upošljava 45 radnika, a ukupan prihod firme u odnosu na 1998. godinu uvećan je za 35 puta. Komercijalno je pokriveno cijelo tržište BiH, a firma posjeduje i 6 vlastitih maloprodajnih objekata tj. izložbeno-prodajnih salona u Sarajevu, Mostaru, Brčkom, Modriči, Bijeljini i Tesliću.

1999.godine menadžment preduzeća odlučuje, da se u okviru firme, pokrene djelatnost proizvodnje građevinske stolarije, što u stvari predstavlja početak njihovog intenzivnog razvoja. Građevinska stolarija ove firme je, kvalitetom svojih proizvoda, odavno našla svoje mjesto na tržištu, a pokretanjem proizvodnje iste, uz ustrajnost, poštivanje zahtjeva kupca, korektan od-

nos prema dobavljačima i stalno "oslušivanje tržišta" rezultiralo je sve većom potražnjom njihovih proizvoda. Proizvodni program čine ulazna i sobna vrata, te prozori i balkonska vrata, a proizvode se u svim euro-standardnim dimenzijama. Važno je istaći da svi repromaterijali koji se ugrađuju u proizvode, kao i kvalitet izrade ispunjavaju zahtjeve standarda važećih u Evropskoj uniji. Firma stolariju prodaje širom BiH, određeni dio se izvozi u R. Hrvatsku, a vode se konkretni razgovori za izvoz u Libiju. Kako je istaknuto na ceremoniji što je najbitnije, radnici su zadovoljni svojim statusom, plaće se redovno isplaćuju, kao i sve dadžbine prema državi. —«Otvaranjem ove hale osim novih hiljada kvadratnih metara savremenih proizvodnih pogona, povećan je i broj radnika, čime se na konkretan način utiče na sveukupan društveno-ekonomski razvoj naše Općine i države.» istakao je načelnik Suljagić.

Omega stiže u Srebrenik- 50 novih radnih mjesta

Načelnik Općine Srebrenik Osman Suljagić i generalni direktor firme d.o.o «Omega» Miralem Hrustemović, dana 21.06.2008.g., položili su kamen-temeljac za izgradnju novog tržnog centra ove kompanije. Novi poslovni centar «Omega» u Srebreniku bit će smješten pored magistralnog puta Tuzla-Orašje u blizini nekadašnjeg «Sinexa», i čija izgradnja bi trebala uskoro da počne. Tako će «Omega»



Polaganje kamen-temeljca novog centra Omega

nakon Tuzle, Lukavca, Živinica, Kalesije, Banovića, Sarajeva, Cazina te Bosanske Krpe, doći i u Srebrenik, u kojem će imati više od 4.000 metara kvadratnih prodajnog prostora, sa suturenom, prizemljem, prvim i drugim spratom. Predviđeno je da će investicija iznositi više od 5 miliona maraka, gdje će biti otvoreno novih 50 radnih mjesta. Predviđeno je da suteran sadrži prodaju tekstila, alata, posuđa, igrački, dječije opreme, poljoprivrednih alata..., u prizemlju ponudu super-marketa, na I spratu bijelu tehniku i elektroniku te na II spratu salon namještaja i tepiha.

INFRASTRUKTURA

Nastavljena izgradnja pješačke zone

Kako smo do sada već pisali, početkom juna 2008.godine započela je izgradnja pješačke zone u ulici Alije Izetbegovića u Centru Srebrenika, čime je započeo jedan od najvećih infrastrukturnih projekata na ovom općinskom području, čija vrijednost iznosi blizu 1,7 miliona KM, a radove izvodi građevinska firma «ITK Musić» d.o.o. Srebrenik. Nakon zemljanih radova, zamjene dotrajalih PTT, elektro, vodo i kanalizacionih instalacija dana 21.08.2008.godine uveliko se izvode i radovi na postavljanju kamenih



Uveliko se izvode radovi na drugoj fazi pješačke zone nakon što je postavljena javna rasvjeta po sredini pješačke zone, omogućen je i rad noću. Paralelno sa ovim radovima, nakon što je vlasnik objekta "Pelikan" sam uklonio dio prostora koji je smetao izgradnji druge faze pješačke zone, otpočeli su, i i uveliko traju, radovi i na ovom dijelu pješačke zone. Obzirom da su



Zahvaljujući svjetiljkama omogućiće se polaganje kamenih ploča na prvoj fazi pješačke zone i noću

ploča na pješačkoj zoni u centru Srebrenika. Kako je izjavio dipl. arh. Ibrahim Bajrektarević-nadzor nad izvođenjem radova na izgradnji pješačke zone, ovi radovi će biti nastavljeni i u narednom periodu, a

spomen-obilježje, spomen česma i rasvjeta završeni, već se nazire konačan izgled pješačke zone u Srebreniku, koja će, posebno nakon rekonstrukcije Starog zanatskog centra, sasvim sigurno biti jedna od ljepših u ovom dijelu BiH.

Sendići dobili asfaltni put

Dana 16.08.2008.godine u zaseoku Sendići-Kešetovići, MZ Rapatnica, upriličena je svečanost, na kojoj je otvoren novi asfaltni put. Kako je na ceremoniji istakao Admir Ahmeljinović, predsjednik građevinskog odbora, radi se o asfaltiranju puta dužine



Put su svečano otvorili načelnik Suljagić i najstariji član građevinskog odbora Pašan Ahmeljinović

720m, u što je utrošeno 74500 KM. Tokom govora se posebno zahvalio načelniku općine Srebrenik Suljagić Osmanu, kao i vijećnicima OV-a Srebrenik, koji su odobrili finansiranje ovog projekta sa 70% budžetskih sredstava, dok su ostalo sakupili malobrojni mještani. Načelnik Suljagić je pohvalio složnost 43 domaćinstva ovog zaseoka, koji su bili uporni te uspješno priveli kraju ovaj projekat, koji im obezbjeđuje bolje uslove života, te nagovijestio nove projekte koji se uskoro trebaju realizovati na ovom općinskom području. Nakon što su put, presijecanjem vrpce, svečano otvorili načelnik Suljagić i najstariji član građevinskog odbora Pašan Ahmeljinović, uslijedilo je narodno veselje, koje je trajalo do duboko u noć.



Novi asfaltni put Sendići-Kešetovići u MZ Rapatnica

Modernizirana raskrsnica kod Koprića-mosta



Detalj sa asfaltiranja raskrsnice

Nedavno su radnici firme «Zvornik putevi» d.o.o. Sapna, završili su radove na rekonstrukciji i asfaltiranju dionice regionalnog puta Srebrenik-Gračanica od zgrade SJB Srebrenik do Koprića mosta u dužini od oko 150 metara kao i radove na

Semafori Željeznica FBiH nisu izmješteni

Najveći problem, o kojem smo do sada pisali, nije riješen, a radi se o izmještanju željezničke semaforske signalizacije, koju Željeznice FBiH do sada nisu izmjestile, tako da su dva stuba ostala djelimično u novoj trasi puta, što je za svaku osudu, jer predstavlja potencijalnu opasnost za vozače, ali se nadamo da će se i ovaj problem uskoro riješiti.

rekonstrukciji raskrsnice u Radničkoj ulici. Vrijednost projekta je oko 290.000 KM, a sredstva su zajednički osigurali Vlada TK-a odn. Direkcija za ceste Tuzlanskog kantona i Općina Srebrenik. Uz polaganje



Nova raskrsnica kod Koprića-mosta

novog sloja asfalta, izgrađene su i pješačke staze, rekonstruisani su postojeći i izgrađeni novi odvodi površinske vode kao i kanalizacije, te postavljeni podzemni vodovi za javnu rasvjetu. Završetkom ove rekonstrukcije građani su dobili modernu saobraćajnicu i savremeni ulaz u grad iz pravca Gračanice.

INFRASTRUKTURA

Junuzovići dobili asfaltni put

Nedavno su radnici firme «ITK Musić» d.o.o. Srebrenik završili radove na pripremi podloge i asfaltiranju puta, dužine 400m i širine 3m, za naselje Junuzovići u Gornjem Srebreniku. -Vrijednost navedenog projekta je oko 55.000 KM, općina Srebrenik je iz budžeta obezbijedila 70% potrebnih sredstava dok su preostali dio skupili mještani



Novi asfaltni put za naselje Junuzovići

Junuzovića. Na ovaj način i mještani ovog naselja su konačno dobili asfaltni put, što je posebno obradovalo učenike i nastavnike područne škole u Gornjem Srebreniku, obzirom da im je sada znatno lakši i sigurniji pristup školi.-istakao je Čidić Mujo, predsjednik Vijeća MZ Gornji Srebrenik.

U Podorašju asfaltirano 2400m a u Likama 1200m puta

U sklopu realizacije brojnih infrastrukturnih projekata dana 22.08.2008.godine, u sklopu obilježavanja dana MZ Podorašje, upriličena je svečanost na kojoj su zvanično otvorena dva novoasfaltirana putna pravca. Općinski načelnik Osman Suljagić, predsjednik MZ Podorašje Nesib Ahmetović i građevinskog odbora Nazif Mahmutović su, zajedničkim presijecanjem vrpce, zvanično otvorili put Hodžići-Krušik u dužini od 2.000 metara, ukupne vrijednosti od 160.000 KM, a nešto kasnije načelnik Suljagić, predsjednik građevinskog odbora Mijić Berislav i Mijić Boško su, zajedničkim presijecanjem vrpce, otvorili put Šibonjići-Božići, dužine oko 400m i vrijednosti 30.000 KM. Oba projekta je Općina Srebrenik iz budžeta finansirala sa 70%, a preostalih

30% su obezbijedili mještani Podorašja. Nakon polaganja cvijeća i učenja fatihe poginulima iz dva posljednja rata upriličena je svečana sjednica povodom



Sa presijecanja vrpce puta Krušik-Podorašje

dana MZ Podorašje. -U proteklom periodu općina Srebrenik je, uz aktivno učešće i finansijsku pomoć samih mještana, na području MZ Podorašje završila nekoliko značajnih infrastrukturnih projekata. Osim navedenih pri kraju je i projekat rekonstrukcije 2000 m reg. puta Previle-Čelić, dionica od Previla do skreta-



Sa presijecanja vrpce puta Šibonjići-Božići


nja za Podorašje, sa 3000 KM smo pomogli sanaciju dotrajale zgrade MZ Podorašje, a danas su radnici firme «Elektro EM» Brčko DC otpočeli izgradnju javne rasvjete u Podorašju I u dužini od oko 2,2 km, vrijednosti oko 42.000 KM, nakon čega bi, u narednom periodu trebala krenuti izgradnja javne rasvjete i u naselju Drapnići-kazao je načelnik Suljagić.



Narednog dana su, zajedničkim presijecanjem vrpce, načelnik Suljagić i predsjednik MZ Kuge Huremović Bego, otvorili novi asfaltni put Kuge-Like dužine oko 1000m te put Like-Majevice dužine oko 200m u šta je ukupno uloženo oko 128.000 KM. Oba projekta je Općina finansirala sa 80% potrebnih sredstava.

Za rasvjetu u Dubokom Potoku 200.000 KM

Svečanošću, upriličenom dana 17. juna 2008.godine, na platou ispred OŠ «Duboki Potok», pred oko stotinjak mještana, zvanično je obilježen završetak



Emin Likić: Uspjeli smo izgraditi 12,5 km rasvjete radova na izgradnji javne rasvjete na kompletnom području Dubokog Potoka i Bjelava. Veoma zahtjevne radove su uspješno izveli radnici firme «Elektro EM» Brčko DC, izgradivši javnu rasvjetu u ukupnoj dužini od oko 12.500 metara. U izgradnju javne rasvjete uloženo je oko 172.000 KM, koje su u podjednakom procentu obezbijedene iz budžeta Općine Srebrenik i od mještana Dubokog Potoka. Obzirom da je u okviru realizacije ovog projekta obavljena i rekonstrukcija niskonaponske mreže, čime će biti osigurano znatno kvalitetnije napajanje električnom energijom preko 700 domaćinstava mjesnog područja Duboki Potok, u realizaciju projekta se uključila i «Elektroprivreda BiH», obezbijedivši sredstva za rekonstrukciju



Detalj javne rasvjete u Dubokom Potoku

niskonaponske mreže u iznosu 28.000 KM, tako da je konačna vrijednost investicije preko 200.000 KM. Na prigodnoj svečanosti prisutnima se obratio Emin Likić, predsjednik Građevinskog odbora, koji se zahvalio općinskom načelniku Osmanu Suljagiću na nesebičnoj pomoći, kao i svim građanima, koji su se vlastitim pri-

lozima, uključili u realizaciju jednog ovako zahtjevnog i skupog projekta. Načelnik Suljagić je izrazio zadovoljstvo urađenim, pohvalio Likića i njegove najbliže saradnike, bez kojih bi ovaj projekat bio teško ostvariv, te podsjetio da bi se uskoro trebao riješiti i problem prečišćavanja vode u lokalnom vodovodu. Nakon što su dodijeljene plakete najzaslužnijim pojedincima i firmama, prigodno druženje je nastavljeno u holu OŠ Duboki Potok.

Rekonstruisan dio reg. puta Srebrenik-Orahovica

Nedavno je u Srebreniku završen još jedan vrijedan infrastrukturni projekat, u koji je Direkcija cesta TK-a uložila oko 200.000 KM. –Radnici firme



Ovako je počelo...

«ROAD-ING» d.o.o. Gračanica su uspješno izvršili rekonstrukciju dionice regionalnog puta Srebrenik-Orahovica-Gračanica, od raskrsnice u Barama do tkz. «Đulinog brda», dužine od oko 400m i širine 6m sa trotoarima i odvodnjom površinske vode. Obzirom da je



...a ovako završilo

postavljena i podzemna instalacija za buduću javnu rasvjetu, te da su brzo i kvalitetno završeni radovi na rekonstrukciji ovog regionalnog puta, zadovoljstvo mještana je bilo očito-ističe Halid Kovač, stručni savjetnik za investicije, planiranje i razvoj.

DAN OPĆINE

SVEČANO OBILJEŽEN 21. JUNI DAN OPĆINE SREBRENİK



Sa svečane sjednice OV-a Srebrenik

Dan općine Srebrenik koji se u novijoj historiji obilježava 21. juna, po prvi puta je svečano obilježen na Starom gradu, poznatoj «Gradini» u Gornjem Srebreniku. Nakon polaganja cvijeća na spomen-obilježju ispred Centra za kulturu i informisanje, na Starom gradu je održana svečana sjednica Općinskog vijeća Srebrenik. Prije održavanja ove sjednice, na jedan poseban i autentičan način upriličeno je uručivanje ključeva Starog grada načelniku Osmanu Suljagiću, koji je izveden u režiji Vlade Keroševića, poznatog tuzlanskog glumca i profesora na Akademiji scenskih i dramskih umjetnosti u Tuzli. Svečanoj sjednici izuzev brojnih gostiju iz privrednog, kulturnog i javnog života, između ostalih prisustvovali su i ministar u Vladi FBiH Nail Šećkanović, ministri u Vladi TK Sead Bećirović



Autentičan scenarij za Dan općine



Dobitnici priznanja u povodu Dana općine

i Faruk Vikalo, zatim predsjednik Skupštine TK Amir Fazlić kao i drugi brojni gosti. Nakon što je prikazan trinaestominutni film o onome što je urađeno u posljednjoj godini na ovom općinskom području u režiji našeg novinara Amira Ibrića i snimatelja Emira Hodžića, uručena su priznanja onima koji su to u posljednjoj godini po raznim osnovama zaslužili.



*Zapažen nastup kulturno-umjetničkog društva
«Alternativnog teatra»*

Nakon sjednice na platou ispred Starog grada održan je kulturno-zabavni program u izvedbi budućih glumaca, studenata Akademije scenskih i dramskih umjetnosti iz Tuzle, folklornog ansambla «Alternativnog teatra» Srebrenik i folklorne sekcije Kulturno-umjetničkog društva «Mehmed Ibrahimović» iz Srebrenika. Program obilježavanja 21. juna Dana općine Srebrenik završen je koncertom Elvire Rahić i naših mladih, još neafirmisanih pjevača, na platou ispred Gradske fontane te vatrometom koji je posmatralo nekoliko hiljada građana Srebrenika.



POLJOPRIVREDA

U Špionici održani "Dani polja"



Manifestacija je bila izuzetno posjećena

Poljoprivredni zavod Tuzlanskog kantona krajem avgusta organizovao je u krugu Voćnog rasadnika u Špionici, manifestaciju pod nazivom «Dani polja», koja je priređena prvenstveno za uzgajivače kukuruza. -Cilj ove manifestacije je da poljoprivrednim proizvođačima sa naših prostora predstavimo sortimente hibrida koji su trenutno aktuelni i koji dolaze u narednom periodu. Želimo da poljoprivredni proizvođači na licu mjesta, svojim okom vide za koju će se sortu hibrida opredijeliti i da odluče koju će sortu uvrstiti u svoj sjetveni plan za narednu godinu, kaže Nusret Šerifović, direktor Poljoprivrednog zavoda Tuzlanskog kantona. Do ove godine poljoprivrednim proizvođačima sa ovih područja su se predstavljale četiri firme za proizvodnju sjemenskog materijala, a ove godine tu je već sedam firmi koje predstavljaju svoje hibride. -To su uglavnom novi hibridi koji uopće nisu ili su bili vrlo malo do sada zastupljeni u Tuzlanskom kantonu, Semberiji, Posavini..., pa ako hoćete i cijeloj BiH. Firme za proizvodnju sjemenskog materijala su prepoznale ovo područje za plasman svojih sjemena i zato su došli danas ovdje da se predstave. Sjetvene površine su već povećane ove godine u odnosu na prošlu, gdje je prošlogodišnja suša dosta smanjila prinose, kaže Šerifović. Tako se naši poljoprivredni proizvođači sve više okreću povećanoj proizvodnji hibridnog kukuruza, te dostižu prijeratnu proizvodnju. - Ne samo da se vraćamo na prijeratni nivo proizvodnje kukuruza, nego će u narednom periodu kukuruz biti kultura koja će dominirati na ovim prostorima sjeveroistočne BiH. Cilj je da se kukuruz što više koristi za proizvodnju silaže ili da se kukuruzno zrno koristi u stočarskoj proizvodnji, te da se kroz proizvodnju i rodaju mesa i mlijeka kukuruz znatno bolje valorizuje u odnosu na klasičnu prodaju, kaže Šerifović.

Admir Zahirović iz G.Moranjaka uspješan u plasteničkoj proizvodnji


Iako razvoj plasteničke proizvodnje na području općine Srebrenik nema posebno dugu tradiciju, ipak primjer Admira Zahirovića iz Gornjih Moranjaka kod Srebrenika, svjedoči da bi ovaj vid poljoprivredne proizvodnje mogao postati prepoznatljiv i na ovom općinskom području. -Sa ovim biznisom krenuo sam 2001.godine. Tada sam imao dva plastenika od po 400 kvadrata. Svake godine sam proširivao kapacitete, tako da sada imam 2.800 kvadratnih metara plastenika, s tim da planiram proširenje na 4.000 kvadratnih metara, kaže Zahirović. Njegova plastenička proizvodnja bazira se na paradajzu, paprikama, krastavcima, kupusu i jagodama. Admir ističe kako nema problema sa distribucijom, tako da sve što se proizvede, to se i prodaje. Ipak, od presudnog značaja su i podsticaji za poljoprivredne proizvođače, kako sa općinskog tako i sa viših nivoa vlasti. S obzirom da su plastenici Admira Zahirovića u Gornjim Moranjcima dostigli jednu visoku tačku proizvodnje, a planirano je i proširenje, to su i predstavnici «Poljoprivrednog zavoda» Tuzlanskog kantona posjetili ovo mjesto. - Kod Admira smo došli prije svega kako bismo mu ukazali da ima pravo aplicirati na podsticaje sa viših nivoa vlasti, s obzirom da on do sada nije koristio ova sredstva. Velika je stvar što je vlasnik ovih plastenika riješio pitanje vodosnadbijevanja, što je jedna od najbitnijih stvari u plasteničkoj proizvodnji. Također, želimo Admiru pomoći kao bi on postao pravni subjekat i da se u budućnosti «veže» za tržišne centre, koji su budućnost plasmana, a ne pijace. Uz to želimo poručiti i njemu i ostalim poljoprivrednim proizvođačima da predstavljaju svoje projekte, kako bi što lakše dobili podsticajna sredstva, koja će svake godine biti sve veća, kazao je direktor «Poljoprivredne zadruge» TK, Nusret Šerifović.



Plastenička proizvodnja postaje sve isplativija

OGUS

OGUS postaje prepoznatljiva kulturna manifestacija u regionu



OGUS je otvorio načelnik Osman Suljagić

U subotu 23. avgusta 2008. godine, na platou ispred Starog grada u Gornjem Srebreniku, upriličeno je svečano otvorenje manifestacije «Srebrenik otvoreni grad umjetnosti –OGUS 2008»- desetodnevne manifestacije koja je trajala do kraja mjeseca. Pred više stotina posjetilaca koji su došli da uveličaju ovu kulturnu manifestaciju gostima se obratio načelnik Općine Srebrenik, Osman Suljagić koji je otvorio ovogodišnji OGUS.

HUSEJN LELIĆ POKRENUO «OGUS»

«OGUS se organizuje redovno od 1977. godine, kada je SIZ kulture Općine Srebrenik, u saradnji sa «Galerijom portreta» iz Tuzle učinio prve korake ka oživljavanju Starog grada Srebrenika u «Otvoreni grad umjetnosti» gdje je dolazilo do susreta stvaraoca iz inozemstva i BiH, dajući time nove stvaralačke impulse napuštenom gradu u pokušaju da ga poslije mnogo vijekova ponovo vrata u život. Drago mi je da se među prisutnima nalaze ugledni gosti Bajazit Jašarević, Zlatko Dukić..., ali posebne pozdrave, sa željom da ga zdravlje i ubuduće dobro služi, upućujem gospodinu Huseinu Leliću, čovjeku koji je davne 1977. godine, kao prvi čovjek Općine Srebrenik, pokrenuo ovu manifestaciju. Tokom ovih deset dana predviđen je bogat kulturno-zabavni program: pozorišne predstave, koncerti, tribine, izložbe..., tako da bi trebalo biti za svakog po nešto što ga zanima, kazao je načelnik Općine Srebrenik, Osman Suljagić koji je otvorio ovu manifestaciju.



Dževad Šabanović je dao poseban štih OGUS-u

U nastavku programa, pred nekoliko stotina gledalaca, održan je poetsko-dramski kolaž «Bajka o Srebreniku» (tekst Atifa Kujundžića) u izvođenju glumaca teatra «Kabare» Tuzla: Vlade Keroševića, Irfana Kasumovića, Milice Kerošević i studenata Akademije dramskih i scenskih umjetnosti u Tuzli, te je izvedeno nekoliko popularnih djela klasične muzike u maestralnoj izvedbi dueta na klaviru i violini, profesora Sarajevske Muzičke akademije Dževada Šabanovića i Mirjane Papić.



Otvaranje OGUS-a je bilo jako posjećeno

U nastavku programa gledaocima se predstavio hor «Preporoda» Srebrenik, plesna skupina Alternativnog teatra Srebrenik te srebrenički sazlija Ahmed Hogić. Tokom večeri, u sklopu manifestacije OGUS-a, na poligonu malih sportova u Centru Srebrenika, pred posjetiocima, uglavnom mlade dobi, održan je koncert «Hip-hop Jam», Srebrenik, crtanje grafita te koncert alternativne muzike. Inače, svi događaji tokom ove desetodnevne manifestacije bili su dobro posjećeni, tako da «Otvoreni grad umjetnosti-OGUS» iz godine u godinu postaje sve popularnija i prepoznatljivija kulturna manifestacija ne samo na području općine Srebrenik nego Bosne i Hercegovine pa i cijele regije, s obzirom da se na manifestaciji pojavljuju poznate ličnosti koji daju dodatan «štih» OGUS-u.

Promovisan V i VI broj "Srebreničkog biljega"



Promovisan novi broj «Srebreničkog biljega»

U sklopu manifestacije «OGUS 2008» u Plavoj sali Centra za kulturu i informisanje u Srebreniku, upriličena je promocija dvobroja (V i VI broj) časopisa za kulturnu historiju «Biljeg Srebrenika». Promocija je otvorena predivnim zvucima saza srebreničkog sazlije Ahmeda Hogića, koji je izvedbom pjesme «Srebrenika nema do Travnika», oduševio prisutne, među kojima i autora pjesme i jednog od najvećih sazlija na području BiH, Srebreničanina dr. Hašima Muharemovića. Nakon što je ukratko predstavljen sadržaj ovog dvobroja prisutnima se obratio prof. Rusmir Djedović, koji je u nadahnutom govoru izjavio da se, zahvaljujući prije svega grupi entuzijasta, ovakvim časopisima, osim velikih BH centara, mogu podičiti i malobrojne tkz. «male sredine» poput Srebrenika i njegove Gračanice, te da će se taj uspjeh, koji se ogleda u nastavku izlazenja ovog časopisa moći valorizovati tek u budućnosti. Prisutnima se predstavila i prva diplomirana glumica iz Srebrenika Fatima Džaferović, koja je recitovala nekoliko pjesama iz ovog časopisa. Dr. Edin Mutapčić je, analizirajući po segmentima sadržaj časopisa, pohvalio upornost autora, koji su, i pored brojnih poteškoća, zajedno sa njim uspjeli prirediti za čitaoce dvobroj časopisa, obzirom da prošle godine isti nije izdavan. U nastavku je detaljnije predstavio sadržaj ovog, po mnogima, do sada najkvalitetnijeg «Biljega Srebrenika», istakavši da je, osim naših autora zastupljen i rad autora iz Hrvatske, obzirom da je objavljeni rad izv. prof. dr. sc. Ivana Balte sa Filozofskog fakulteta Osijek, koji se fokusira na područje općine Srebrenik, naglasivši da će pravu vrijednost časopis imati u budućnosti, kada će budućim historičarima i publicistima, služiti, kao referentni dokument, tj. kao izvor vjerodostojnih dokumenata. Na kraju govora je pozvao i sve druge kulturne radnike sa našeg općinskog područja i šire da se aktivno uključe u uređivanje narednih brojeva časopisa.

Srebrenički dani saza

«Srebrenički dani saza» održani su u okviru OGUS-a. U Plavoj sali Centra za kulturu i informisanje, održana je tribina posvećena sevdalinci i sazu, kojoj su pored moderatora Vehida Gunića prisustvovali Enisa Šojko Hajdarević-etnomuzikolog te ugledni gosti-izvođači Emina Zečaj, Zekija Suman i Nisveta Junuzović, te ugledne sazlije Sulejman Šarić, Rajko Simeunović, Imšir Malkić, Hašim Muharemović...



Sazlije se zadovoljile ukuse srebreničke publike

Nakon tribine na kojoj se govorilo o historijatu te o trenutnom položaju sevdalinke i saza u našem društvu, u velikoj sali Doma kulture, pred oko 300 gledalaca, održan je veoma uspješan nastup nekoliko naših sazlija, manje ili više poznatih široj publici.

Smotra folklora



Defile smotre folklora ulicama Srebrenika

U Srebreniku je održana Smotra folklora na kojoj je učešće uzelo 7 kulturno-umjetničkih društava iz BiH. Učesnici smotre obučeni u tradicionalne narodne nošnje prvo su prodefilovali ulicama Srebrenika, a potom su na poligonu malih sportova upriličili bogat kulturno-zabavni program. Pred blizu 1.000 posjetilaca nastupili su članovi kulturno-umjetničkih društava «Sevdah», Vučkovci, «Preporod» Odžak, «Slovo u džepu» Žepče, «Igman» Hadžići, «Behar» Maoča, te članovi folklornih sekcija Alternativnog teatra i Kulturno-umjetničkog društva «Mehmed Ibrahimović» Srebrenik.

Marko Vešović i Šimo Ešić gosti OGUS-a

U sklopu manifestacije «OGUS 2008», u organizaciji Centra za kulturu i informisanje Srebrenik, dana 29.08.2008.godine, u Plavoj sali srebreničkog Doma kulture održano je književno veče, na kojem se oko 100 ljubitelja pisane riječi imalo priliku družiti s književnikom Markom Vešovićem i dječjim piscem Šimom Ešićem. U okviru književne večeri, predstavljaje-



Sa književne večeri

na je Vešovićeva zbirka pjesama «Poljska konjica», a posebne emocije kod velikog broja posjetilaca izazvalo je recitovanje njegove pjesme «Panj» posvećene stradanju mladih u proteklom ratu. Gost iz Tuzle Šimo Ešić predstavio je više pjesama za djecu čiji su stihovi i kod velikog broja starijih ljubitelja pisane riječi izazvali nostalgična sjećanja na doba djetinjstva i odrastanja. Na ovoj nesvakidašnjoj književnoj večeri koja je predstavljala neobičan spoj poezije za djecu i odrasle, uz same autore, njihove pjesme recitovali su i članovi recitatorske sekcije Gradske biblioteke Srebrenik.

Izložba slika Vinka Lamešića

Ovogodišnji OGUS je uveličan 17. po redu samostalnom izložbom slika akademskog slikara Vinka Lamešića iz Tuzle. Veliki broj posjetilaca, ljubitelja




Izložba slika Vinka Lamešića

likovne umjetnosti, mogao je da uživa u izloženim slikama ovog eminentnog tuzlanskog umjetnika, na kojima preovladavaju motivi grada Tuzle, pejzaži i motivi mrtve prirode. Navedene slike su rađene slikarskim tehnikama ulje na platnu i pastel. -Lamešić se, kao autor minuciozno slikanih minijatura ili malih formata,

koje su obilježile početak njegovog umjetničkog stvaralaštva, pojavio osamdesetih godina prošlog stoljeća. Izraženi smisao za detalje i malu formu nastojao je pretočiti u velike formate koji odišu životom, čime je sebi otvorio prirodan put od figuralnog ka apstraktnom slikarskom zahvatu. Postavljena izložba slika bila je otvorena za sve građane, zaljubljenike likovne umjetnosti i u narednih desetak dana.

Modna revija ABC MODELS

Dana 28.08.2008.godine u sklopu manifestacije «OGUS 2008», na platou ispred Doma kulture Srebrenik, održana je modna revija kuće ABC MODELS Tuzla. Ova veoma uspješna i dobro posjećena revija je koncipirana na prezentaciji poznatih modnih kuća odn. modela modnih kreatorki Alise Novalić iz Tuzle, Marijane Hrvić iz Lukavca..., koje su nosile profesionalne manekenke modne agencije ABC MODELS, a među njima i naša sugrađanka Čizmić Alma, učenica Mješovite srednje škole Srebrenik.



Nastup naše sugrađanke Čizmić Alme

Djeca crtaju svome gradu

Dana 25.08.2008.godine, održane su zanimljive i već tradicionalne manifestacije za djecu, pod nazivom «Djeca slikaju svom gradu» i «Djeca pjevaju hitove». Preko 100 mališana uzrasta od 5 do 10 godina, na rolni papira dugačkoj oko 50 m, zajednički crtajući predmete prema slobodnom izboru, imalo je priliku izraziti svoju kreativnost i slikarsko umijeće, nakon čega je



na platou ispred gradske fontane održana tradicionalna manifestacija «Djeca pjevaju hitove». Na festivalu, koji je, kao i prošle godine, bio revijalnog karaktera, predstavili su se dječaci i djevojčice iz srebreničkih osnovnih škola, čiji je nastup pratio veliki broj posjetilaca.

VJERSKI OBJEKTI

Džamija u Špionici iz 17.vijeka postaje kulturno-historijski spomenik



Kulturno-historijski spomenik BiH

Džamija u naselju Špionica iz 17.vijeka, koja je od Centra Srebrenika udaljena sedam kilometara, postat će kulturno-historijski spomenik Bosne i Hercegovine. Nakon što su džematlije napravile novu džamiju u Špionici, ova stara nije u funkciji već deset godina, a po Odluci Islamske zajednice BiH, više nijedna džamija ne smije biti srušena. U restauraciju ove džamije bit će utrošeno 119.000 KM, koje je obezbijedilo Federalno ministarstvo nauke, kulture i sporta i Općine Srebrenik, a izvođač radova je građevinska kompanija «Gromex» iz Srebrenika, dok je arhitekta Ibrahim Bajrektarević. U subotu, 28.06. 2008.godine, prigodnom ceremonijom, na svečan način je obilježen početak restauracija ove džamije, na kojoj su između ostalih prisustvovali načelnik Općine Srebrenik, Osman Suljagić, predsjedavajući Općinskog vijeća Srebrenik, prim. dr. Ibrahim Zukić, ministar za rad i socijalnu politiku u Vladi TK, Faruk Vikalo, muftija Tuzlanski Husein efendija Kavazović te glavni imam Medžlisa IZ Srebrenik, Ismet efendija Mustajbašić, dok se brojnim prisutnima predstavio i hor džemata Špionica.

Tutnjevaca dobio novu džamiju



Brojni gosti na otvaranju džamije u Tutnjevcu

U prisustvu nekoliko hiljada vjernika, predstavnika općinskih i kantonalnih vlasti, te predstavnika Islamske zajednice i Katoličke crkve u BiH, 24.08.2008.godine, u Tutnjevcu kod Srebrenika, svečano je otvorena novosagrađena džamija. U izgradnju džamije u Tutnjevcu uloženo je 270.000 KM, a oko 80 posto sredstava prikupile su džematlije, dok su preostali iznos osigurali Općina Srebrenik i brojni donatori. Vjernicima su se obratili Osman Suljagić, načelnik Općine Srebrenik, Ismet ef. Mustajbašić, glavni imam Medžlisa IZ Srebrenik, Blaž Marković, župnik katoličke crkve u Špionici, Sead ef. Seljubac, izaslanik muftije tuzlanskog i Ismail Smajlović, izaslanik reisu-l-uleme Mustafe ef. Cerića. Nakon obraćanja gostiju i prigodnog vjerskog programa novosagrađenu džamiju u Tutnjevcu otvorio je vakif Hazim Bašić iz susjednog džemata Donja Špionica, koji je za njenu izgradnju donirao 30.000 KM.

Nova džamija i u Kurtićima



Nova džamija u Kurtićima

U džematu Kurtići nedavno je otvorena novosagrađena džamija, čija je izgradnja mještane ovoga naselja koštala više od 150.000 KM. Pred više od 2.000 vjernika ovu bogomolju je otvorio sin Saliha Kurtića, umjesto oca koji je bio bolestan, a u izgradnju džamije uložio je 5.000 KM. Otvorenju su prisustvovali načelnik Općine Srebrenik, Osman Suljagić, zatim Osman Kozlić i Mirsad Mahmutović, predsjednik Ureda za dijasporu rijaseta Islamske zajednice BiH.

ŽIVOT

Moto-klub Gradina ugostio hiljade bajkera



Sa motorijade

Nedavno su članovi Moto-kluba «Gradina» uspješno organizovali, druge po redu, moto susrete u Srebreniku, gdje se pojavilo na hiljade «bajkera» iz BiH, Hrvatske, Srbije, Slovenije, Crne Gore, Austrije, Slovačke, Njemačke... U trodnevnoj manifestaciji koja je organizovana na pomoćnom terenu «Gradskog stadiona» u Srebreniku, priređen je bogat program sa nekoliko takmičenja u više oblasti. Zbog visokih temperatura, koje su za vrijeme ovih moto susreta dostizale i 35 stepeni celzijusa, motoristi su nerijetko tražili



Brojni fanovi na rok koncertu osvježenja i u obližnjim bazenima «Inter» koje su svakodnevno posjećivali. Kao «šlag na tortu» bio je nastup srbijanske rock-grupe «Yu grupa», zbog koje se na ovome koncertu pojavilo dodatnih posjeti-laca, prvenstveno mladih iz Srebrenika i okoline, koji su dodatno uveličali ovu manifestaciju.

BIT-centar dolazi u Srebrenik?

U organizaciji Omladinske organizacije "LINK" Srebrenik u Plavoj sali Doma kulture nedavno je održana zanimljiva i dobro posjećena tribina na temu "Zapošljavanje mladih-BIT centar u Srebreniku-mogućnosti i perspektive". Gosti predavači bili su Elvir Čaušević, uspješni biznismen,



Sa tribine: Mladi su bili veoma zainteresovani

kao i Robert Martić, menadžer BIT centra u Tuzli. Oni su prisutnima prenijeli svoja, uglavnom pozitivna, iskustva u vezi zapošljavanja mladih i pokretanje firmi u okviru biznis inkubator centra. Pokrovitelj tribine bio je načelnik Općine Srebrenik Osman Suljagić, koji je u svom izlaganju podržao ideju i potvrdio zainteresovanost Općine za pokretanje jednog ovakvog centra. -Ideja Biznis inkubator centra u Srebreniku nastala je među mladima iz "LINK-a" zato što je zapošljavanje svakako najvažnije pitanje mladih ljudi u našem gradu, a jedan ovakav Centar bi sigurno mladima ponudio novu perspektivu, s obzirom na brojne pogodnosti koje Inkubator-centar može ponuditi mladima. Nova radna mjesta, povoljni uvjeti za osnivanje firmi, mogućnosti dodatnog obrazovanja i usavršavanja značili bi i smanjenje trenda odlaska mladih i talentovanih ljudi iz našeg grada, rekao je Mirza Čidić, predsjednik "LINKA". Na tribini je prisustvalo više od 70 ljudi, a opće je mišljenje da je BIT-centar potreban i u narednom periodu, uz pomoć Općine, slijede dalje aktivnosti u vezi pokretanja Centra.

Povratnicima u Potpeć bolji uslovi za život

Predsjednik MZ Potpeć Milorad Blagić, nedavno je ugostio predstavnike Općine Srebrenik, «Crvenog krsta» i «Mreže trenera», s kojima je razgovarano o održivom povratku stanovnika srpske nacionalnosti, koji ponovo žive u svojim prijeratnim domovima. Blagić je zajedno sa mještanima Potpeća iznio prioritete ciljeve koji bi se trebali riješiti u narednom periodu, kako bi se istima omogućio bolji život. -U Potpeću bi trebalo osnovati jednu zemljoradničku zadrugu, koja bi otkupljivala voće, povrće i dr. Zatim potrebno je riješiti i neke infrastrukturne projekte poput izgradnje mosta koji spaja Potpeć sa magistralnim putem, a veoma je važna i obnova Doma kulture. Do sada smo imali korektnu saradnju sa predstavnicima vlasti Općine, pa vjerujem kako će ona biti i dalje na tom nivou, kaže Blagić. Ispred Općine Srebrenik, prisustvovao je Halid Kovač, koji je istakao: -Posebno nas raduje što se u Potpeć vraćaju prijeratni stanovnici. Općina Srebrenik je uvijek bila multinacionalna općina u kojoj su stanovnici svih religija živjeli zajedno. Do sada je Općina Srebrenik pomagala održivi povratak, a mi ćemo i ubuduće nastojati da udovoljimo njihovim zahtjevima, kako bi imali što kvalitetnije uslove za život.



Milorad Blagić

Uskoro usluge hemodijalize i u Srebreniku

Uskoro bi blizu 40 pacijenata sa područja općine Srebrenik, koji tri puta sedmično odlaze na hemodijalizu u Tuzlu i Gračanicu, moglo ove terapije obavljati u Domu zdravlja u Srebreniku. Naime, grupa naučnika «Bosna» iz Frankfurta, koju su predstavljali Amira i Benjamin Bieber, posjetili su direktoricu Doma zdravlja u Srebreniku, doktoricu Senadu Kovač, s kojom su



Sa sastanka u Domu zdravlja Srebrenik

razgovarali o ovome problemu. – Aparati za hemodijalizu su svakako potrebni našem Domu zdravlja. Dakle, mi imamo dovoljno prostora, koji je potrebno još malo preurediti, za ove aparate, a također posjedujemo i kvalitetan i stručan kadar, tako da bi ova donacija bila odlična stvar. Uz to, potrebno je dobiti još samo odobrenja od ministarstava i mislim da tu ne bi trebalo da bude nikakvih problema, kaže direktorica JZU Doma zdravlja u Srebreniku, Senada Kovač. Grupa naučnika «Bosna» već nekoliko godina bavi se obnavljanjem socijalne infrastrukture, zatim kooperacijom sa školama, ali i sa drugim, uglavnom socijalnim projektima, u našoj zemlji, ali i u drugim državama koje se nalaze u tranziciji. – Mi trenutno radimo na tome kako bi Domu zdravlja u Srebreniku obezbijedili aparate za hemodijalizu. To je nešto što je možda u ovome momentu i najpotrebnije za ovu ustanovu i gotovo smo sigurno uvjereni kako ćemo uspjeti u ovome, kaže Benjamin Bieber, doktor socioloških nauka sa frankfurtskog fakulteta «Johann Wolfgang Goethe».

Na izvoru Osman-bunar otvorena hajr-česma

Na izvoru Osman-bunar u Gornjem Srebreniku, nedavno je direktor «Ingrama» Hazim Bašić, mještanima ovoga naselja, podario česmu sa pitkom vodom. Ovaj ugledni privrednik iz Srebrenika, ovo djelo je uradio u ime Boga, te pred dušu rahmetli oca Muje, majke Čamile te brata Faketa. – Vjerujem kako će ovaj hajr-česma biti



Sa ceremonije otvorenja hajr-česme

od koristi kako mještanima G. Srebrenika, tako i ostalim putnicima-namjernicima, kazao je Bašić prilikom svečanog otvorenja ove česme. Bašić je u izgradnju ove česme na obroncima planine Majevice investirao 30.000 KM, a nakon svečanog otvorenja upriličeno je i narodno veselje, kojem su prisustvovala brojne zvanice, a među njima i prvi čovjek općine Srebrenik, Osman Suljagić. Inače, Hazim Bašić je za izgradnju druge munare u Barama izdvojio 40.000 KM, izgradnju Medžlisa IZ Srebrenik finansirao je sa 50.000 KM, a u dosadašnju izgradnju džamije u Tutnjevcu izdvojio je 30.000 KM.

Planinari «Majevice» proslavili prvu godišnjicu

Pohodom na nekadašnji relej «Lipike» na planini Majeveci, članovi planinarskog društva «Majevecica», obilježili su prvu godišnjicu. Oni su dočekali brojne planinare iz nekoliko krajeva BiH, s kojima su ispred SRC Srebrenik, krenuli u pohod na «Lipike», gdje je obilježena prva godišnjica. Prije dolaska na odredište, planinari su predahnuli na Starom gradu-Gradini u G. Srebreniku, gdje je prof. Sadil Mehmedović, održao čas historije, kazujući o nastanku Starog grada iz 1333. godine, kao i o njegovom kulturno-historijskom značaju. Dolaskom na



Majevicu, gdje su planinari proveli većinu dana, otvorene su renovirane prostorije nekadašnjeg releja «Lipici», koje su pretvorene u planinarski dom. Ovo društvo je u saradnji sa Omladinskom organizacijom «Link», započelo i realizaciju projekta obilježavanja planinarskih staza na planini Majeveci. Ovim projektom predviđeno je da se nekoliko najljepših staza obilježi putokazima, a također staze će biti predstavljene i u formi jednog modernog urađenog džepnog prospekta sa kartama, tekstovima i fotografijama najzanimljivijih mjesta na planini. Realizaciju ovog projekta podržalo je Ministarstvo prostornog uređenja i zaštite okolice TK-a.

SPORT

Omladinci Gradine nastupili na "Gothia cupu" u Švedskoj



Zapažen nastup juniora u Švedskoj

Nedavno su kadeti i juniori Gradine iz Srebrenika, učestvovali na «Gothia cupu» u Švedskoj, na kojem se pojavilo nekoliko stotina ekipa sa svih kontinenata, u konkurencijama «do 16» i «do 18» godina. Juniorska ekipa koju je s klupe predvodio trener Nermin Džanić, u grupnoj fazi takmičenja od četiri ekipe osvojila je drugo mjesto, a u borbi za plasman među 32 ekipe, Srebreničani su poraženi na penale. Kadetski tim pod dirigentskom palicom Samira Adanalića, u grupnoj fazi od četiri ekipe, osvojio je treće mjesto, pa su takmičenje nastavili u «B» finalu, gdje su odigrali još šest mečeva sa ekipama iz Švedske, Švicarske, Francuske, Engleske... Uz kadete i juniore sa trenerima, u delegaciji su bili direktor Gradine Ibro Ibrić, te član Uprave Bego Sendić. Inače, ekspedicija Gradine na ovome turniru u Švedskoj, pojavila se zahvaljujući Općini Srebrenik i načelniku Osmanu Suljagiću koji su pružili veliku podršku našim mladim igračima, dok najveća zasluga pripada Reufu Jahiću, Srebreničaninu koji već nekoliko godina živi i radi u švedskom gradu Degerforsu.

Čehajama trofej Omladinskih igara



Čehaje su pokazale najviše na Omladinskim igrama

Na Omladinskim igrama «Srebrenik 2008», gdje je u desetodnevnom nastupu 12 timova, epitet najbolje ponijela ekipa Čehaja, koja je u finalnom susretu savladala tim Brda sa 4:0. Za najboljeg igrača turnira proglašen je Malik Smajlović, inače član Gradine a za najboljeg golmana izabran je Jasmin Moranjkić. U meču za treće mjesto Sladna je savladala Čifluk sa 5:2. Turnir je odigran u SRC Srebrenik koji je organizator ovoga turnira sa «Asocijacijom mladih»

SDA Srebrenik. Za pobjednički tim nastupili su: Jasmin Moranjkić, Malik Smajlović, Sanel Šehrić, Šefik Havić, Almedin Ahmetović, Irdin Ahmetović, Haris Ibrić i Mirza Smajlović. Trener ekipe je Fahrudin Ahmetović-Loki, a menadžer ekipe Šefket Suljagić.

"OS-Petrolu" Radničke igre



«OS Petrol» je bio najbolji na Radničkim igrama

Radnici preduzeća «OS-Petrol» pobjednici su Radničkih sportskih igara «Srebrenik 2008». Oni su u finalnom susretu bili bolji tek nakon penala nadvisivši ekipu «Hercega '83», koju su savladali sa 3:2. U duelu za treće mjesto, «Persel» je bio bolji od «Herceg-limarije» sa 4:2. Na turniru je učestvovalo 16 ekipa koje su bile podijeljene u četiri grupe od po četiri ekipe. Nedim Mustafić iz «OS-Petrol» je najbolji igrač turnira, prvi golman je Smajl Jusufović, a «Frenki» je dobio priznanje za «fair play».

Špionica domaćin Male seoske olimpijade

U Špionici kod Srebrenika, u organizaciji HKD «Napredak», organizirana je «Mala seoska olimpijada-Špionica 2008», gdje je učestvovalo 115 takmičara iz Špionice, Kalesije, Cerika, Zagreba, Straže, Živinica, Lukavca... i to pod generalnim pokroviteljstvom Općine Srebrenik. Pred blizu 300 posjetitelja održana je olimpijada za djecu osnovne škole i to u kategorijama od 1-4 i od 5-8 razreda u muškoj i ženskoj konkurenciji. U disciplini skok udalj (1-4 djevojčice) prvo mjesto pripalo je Aniti Jurić a (5-8 djevojčice) Katarini Jurić, dok je u muškoj (1-4) najbolji



bio Matej Veselčić a (5-8) Adin Jahić. U kašici su najbolje nosile jaja Kata Veselčić (1-4) i Tamara Jerković (5-8) dok su u muškoj konkurenciji najviše umijeća pokazali Marko Jurić (1-4) i Mato Veselčić (5-8). U disciplini bacanje kamena s ramena najbolja među djevojčicama od (1-4) bila je Anita Jurić, a Lucija Veselčić (5-8). Kada je u pitanju muška konkurencija, najbolji u kategoriji (1-4) je Petar Tadić a (5-8) Matija Jurić. U trčanju na 100 metara najbolja je bila Alma Dedić (1-4), a Katarina Jurić u kategoriji (5-8), dok su u muškoj konkurenciji najbrži bili Petar Tadić (1-4) i Matija Jurić (5-8). Organizator se pobrinuo da organizuje i trčanje na 50 metara, pa je među djevojčicama najbrža bila Adrijana Veselčić, a među dječacima Ivan Mijić.

Daliboru Stojanoviću trofej "Džafer Hogić"



118 učesnika na turniru

U organizaciji Šahovskog kluba «Srebrenik», dana 22.06.2008.godine, u ljetnoj bašti Doma kulture u Srebreniku, održan je 4. memorijalni šahovski turnir «Džafer Hogić», na kojem je učešće uzelo 118 takmičara iz BiH, Srbije, Hrvatske i Slovenije. Ovaj tradicionalni turnir sastavni je dio protokolarnih aktivnosti na obilježavanju Dana Općine Srebrenik, a organizovan je u znak sjećanja na rahmetli Džafera Hogića, poznatog srebreničkog privrednika i velikog zaljubljenika drevne igre. Da se radi o jednom od najačih šahovskih turnira na prostoru TK-a pokazalo je učešće 6 velemajstora, 6 internacionalnih majstora i 10 fide majstora. Nakon devet odigranih kola najbolji je bio internacionalni majstor Dalibor Stojanović iz Bijeljine, sa osvojenih 7,5 poena, na drugom mjestu je velemajstor Leventić Ivan iz Hrvatske sa 7 poena, dok je na trećoj poziciji velemajstor Jovanović Zoran iz Hrvatske s istim brojem poena, ali slabijim dodatnim kriterijima. Četvrti je internacionalni majstor Runić Zoran iz BiH, dok je peto mjesto pripalo iskusnom velemajstoru Kurajica Bojanu iz Hrvatske. Naši Trumić Enes, Omerčić Muhamed i Smajlović Nijaz, iako bez kategorije i rejtinga, su osvjtlali obraz plasiravši se na 21,22 i 23 mjesto sa osvojenih 6 bodova, tj. ispred brojnih zvučnih imena, među kojima ima i velemajstora. Pobjedniku turnira uručena je novčana nagrada u iznosu od 600

KM, a ostali najbolje plasirani igrači podijeli su preostali fond novčanih nagrada u iznosu od oko 3.050 KM.

Sarajevska "Bosna" najbolja u Srebreniku

Povodom Dana Općine Srebrenik, u Srebreniku je odigran košarkaški turnir za predpionire, dječake rođene 1996. godine i mlađe, na kom je učešće uzelo 6 ekipa. KK Gradina Srebrenik može biti zadovoljan osvojenim drugim mjestom, a posebno raduje odlična igra u prvom poluvremenu finalne utakmice sa favorizovanim Sarajlijama. Za najboljeg igrača turnira, komisija u sastavu Samir Avdić, sportski direktor KK Bosna Sarajevo, inače proslavljeni košarkaš, Sead Pešto i Samir Arnautović, odabrali su Mehmeda Krupaliju iz KK Bosna Sarajevo, koji je ujedno bio i najbolji strijelac turnira.



Sarajlije su pokazale najviše

Braća Imširović najbolja u odbojci na pijesku

Uz veliki broj posjetilaca i učesnika, u Srebreniku je odigran peti po redu tradicionalni turnir u odbojci na pijesku, koji je održan povodom Dana općine Srebrenik. Na ovom turniru učestvovalo je 17 ekipa, po dva igrača u svakoj, a nakon mnogo zanimljivih mečeva na vrelom pijesku, prvo mjesto pripalo je braći Imširović Jasminu i Samiru, koji su u finalnom meču savladali ekipu u sastavu Sanel Imamović i Amir Husarić. Ekipe koje su zauzele prva tri mjesta osvojile su pehare i novčane nag-

rade. Generalni pokrovitelj turnira i ove godine bio je načelnik Općine Srebrenik, Osman Suljagić, a nagrade najuspješnijim ekipama uručio je predsjedavajući Općinskog vijeća prim. dr. Ibrahim Zukić.



Braća Imširović

Cijeli događaj upotpunjen je i muzičkim programom koji je priredio DJ Jackson. Organizatori turnira Nermin Mujkanović i Hamid Mehmedović-Kićo, potvrdili su nam da je ovogodišnji turnir bio najbolji i najjači do sada, te da svake godine postaje i sve respektabilniji sportski događaj u Srebreniku.

Srebrenik domaćin auto-kros trka

U organizaciji Autokros kluba «Srebrenik», na novo-sagrađenoj stazi u Babunovićima, nedavno su održane prve autotrke, koje je pratilo oko 2000 posjetilaca. Učestvovalo je oko 30 reli vozača iz BiH, među kojima i nekoliko naših vozača. U klasi automobila do 1800 kubika najbolji je bio Petar Perić, drugi je Dejan Karać a treći Brano Simić. U klasi iznad 1800 kubika najbrži je bio Dejan Karać, drugoplasirani je Miroslav Lukić a trećeplasirani Petar Perić. Uz diplome i pehare, pobjednici su dobili i novčanu nagradu u iznosu od po 1000 KM, drugoplasirani po 700 a trećeplasirani po 500KM.

PONOS SREBRENİKA

Samra Mustafić prvi dipl.pravnik Pravnog fakulteta u Tuzli



Samra Mustafić u kabinetu načelnika

Samra Mustafić (22) iz Srebrenika prvi je diplomirani pravnik Pravnog fakulteta Univerziteta u Tuzli. Ona je bila jedna od 350 studenata prve generacije ovog fakulteta, koji je u Tuzli osnovan prije četiri godine. Posljednji ispit, Građansko-procesno pravo, kod profesora Senada Mulabdića, Samra je položila nakon samo mjesec dana apsolutnog statusa. Ukupno 63 parcijale, odnosno 30 ispitnih predmeta, položila je prosječnom ocjenom osam. - Osjećam se predivno i ponosno. Čast mi je biti prvi diplomant ovog fakulteta, na kojem su mi četiri godine prošle ekspresno, ali će zauvijek ostati u lijepom sjećanju - kazuje Samra. Otac Tahir i majka Mirsada ponosni su na svoju kćerku, koja je u njihovu porodicu na najljepši način donijela drugu diplomu pravika. Osim Samre, Pravni fakultet u Sarajevu prije nekoliko godina završio je i njen pet godina stariji brat Nermin. Samra ne krije svoje ambicije, a školovanje, na istom fakultetu, planira nastaviti i dalje. Prije Pravnog fakulteta završila je tuzlansku Gimnaziju „Ismet Mujezinović“, u kojoj je također bila uzoran učenik. Prvoj diplomiranoj pravnici Pravnog fakulteta nakon posljednjeg ispita ne prestaju stizati čestitke. Osim najbližih članova rodbine i prijatelja, među prvima su Samri važan uspjeh čestitali i dekan ovog fakulteta Hajro Kofrc. Dan poslije Samru su ugostili načelnik Općine Srebrenik Osman Suljagić i predsjedavajući OV Ibrahim Zukić, dok je predsjednik Asocijacije mladih SDA Adis Fazlić uručio Samri prigodne poklone.

Jasmina Smajlović dobila još jednu životnu bitku

Nakon što su Jasmini Smajlović ljekari na Kliničkom centru u Ljubljani morali amputirati desnu nogu zbog raka kostiju, ova 14-godišnja djevojčica vratila se kući u Srebrenik. Na povratku su je dočekali školski drugovi i drugarice ispred ulaza u ulici Alije Izetbegovića sa velikom tortom i cvijećem, među kojima je bio i načelnik Općine Srebrenik, Osman Suljagić. -Zahvaljujem se svim našim sugrađanima koji su me podržavali, posebno načelniku Općine Srebrenik, Osmanu Suljagiću, Održala sam obećanje svojim drugovima da ću se vratiti kući. Iako bez karlice i noge, ali ipak ću se vratiti, kazala je Jasmina po povratku u Srebrenik, gdje su je dočekali brojni drugovi i drugarice. Operacija u Ljubljani protekla je izuzetno uspješno, ali bi teško bila izvodljiva da se nije javio Suljo Halalkić, inače Banjalučanin sa privremenim radom u Švedskoj, koji je osigurao 26.000 eura koliko je bilo potrebno za operaciju Jasmine Smajlović. - Iako je noga amputirana, to neće omesti ni mene ni Jasminu da nastavimo dalje živjeti kao i ostali građani Srebrenika. Želim da se zahvalim načelniku Općine Srebrenik, Osmanu Suljagiću, kao i ostalim sugrađanima Srebrenika, koji su nam pomogli, a posebno smo zahvalne Sulji Halalkiću koji je izdvojio 26.000 eura za Jasmininu operaciju, kaže njena majka, Indira Smajlović. S obzirom da Jasmini sada predstoji dugotrajan oporavak, sa hemoterapijama, podrška ovoj 14-godišnjoj djevojčici i dalje će biti prijeko potrebna, a oni koji joj žele pomoći, mogu to uraditi preko žiro-računa ili pozivom na telefon 090-291-023, a cijena jednog poziva je 2 KM.



Jasminu su dočekali drugovi i drugarice